

მარლანიამ აიღო თერთმეტმეტრიანი საჯარიმო დარტყმა
“დინამო” (თბილისი) – “შრ. რეზერვები” (ლენინგრადი)

ლენინგრადი. 7 მაისი (ტელეფონით ჩვენი სპეციალური კორესპონდენტისაგან).

დღეს ლენინგრადის ს. მ. კიროვის სახელობის სტადიონზე თბილისის “დინამოსა” და ლენინგრადის “შრომითი რეზერვების” მატჩზე აუარებელმა მაყურებელმა მოიყარა თავი. კარგი ამინდი ხელს უწყობდა თამაშის ნორმალურ მსვლელობას.

ლენინგრადის გუნდი თამაშზე გამოვიდა შემდეგი შემადგენლობით: ფარიკინი, საფრონოვი, დონცოვი, ზონინი, გოროხოვი, პონომარევი, ცვეტკოვი, კოლობოვი, სოლოვიოვი, ტენიაგინი, სოჩნევი. თბილისელთა კარს იცავდა მეკარე მარლანია, მცველებად თამაშობდნენ ელოშვილი, რუსაძე და სარჯველაზე, ნახევარდაცვაში იყვნენ მახარაძე და ანთაძე, ხოლო თავდასხმაში – კოტრიკაძე, კ. გაგნიძე, ლოლობერიძე, ვარდიმიადი, თოდრია.

თამაში სწრაფ ტემპში დაიწყო. ლენინგრადელებმა რამდენიმე იერიში მიიტანეს მოწინააღმდეგის კარზე, მაგრამ თანდათან ინიციატივა სტუმრების მხარეს გადავიდა და “შრომითი რეზერვების” კარი რამდენჯერმე აღმოჩნდა საფრთხეში. ერთ-ერთ კომბინაციაში (25-ე წუთზე) გაგნიძემ ადგილი შეიცვალა კოტრიკაძესთან, გაიჭრა მარჯვენა ფლანგზე და ჩააწოდა ცენტრში. ლოლობერიძემ კარგად შეარჩია ადგილი და ბურთი შეუჩერებლივ გაგზავნა კარში – 1:0. თამაშის პირველი ნახევრის დარჩენილ დროში ანგარიშში ცვლილება არ მომხდარა.

შესვენების შემდეგ, უკვე მე-2 წუთზე ლენინგრადელებმა მეტად სახიფათოდ შეუტიეს დინამოელთა კარს. კოლობოვი ბურთიანად გავიდა მარცხენა ფრთაზე, გადააწოდა კარში წინ, სადაც იგი მიიღო ცვეტკოვმა და ძლიერი დარტყმით ანგარიში გაათანაბრა. 1:1. ცვლილება მოხდა ორივე გუნდის შემადგენლობაში. “შრ. რეზერვების” კარში ფარიკინი შეცვალა პესტოვმა, ხოლო “დინამომ” დაშავებული კოტრიკაძის ნაცვლად მოედანზე გამოიყვანა კალოევი. თამაში კიდევ უფრო გამოცოცხლდა. დინამოელებმა ზედიზედ გაითამაშეს ტემპიანი კომბინაციები. 28-ე წუთზე ლენინგრადელთა მხარეს დაინიშნა საჯარიმო დარტყმა მარჯვენა ფრთიდან. ლოლობერიძემ ძლიერი დარტყმით ბურთი გადააწოდა შორს, მარცხნივ. ბურთმა გადაუარა კარის წინ შეჯგუფებულ მოთამაშეებს. აქ იგი მიიღო ანთაძემ და თავით გაგზავნა კარში. ანგარიში გახდა 2:1.

აშკარა საფრთხის წინაშე აღმოჩნდა თბილისელთა კარი. თამაშის დამთავრებამდე 12 წუთით ადრე სარჯველაძემ მოწინააღმდეგის იერიშის უვნებელყოფის მიზნით ბურთი უკან გადასცა მარლანიას. გადაცემას მოუსწრო ცვეტკოვმა და დაეუფლა ბურთს. თბილისელთა მეკარე სწრაფად გამოვიდა კარიდან, მაგრამ ლენინგრადელმა დაასწრო და ცარიელ კარში დაარტყა. “დინამოს” ცენტრალური მცველი რუსაძე იძულებული იყო ხელით გაეჩერებინა ბურთი. თბილისელთა კარში დაინიშნა 11-მეტრიანი საჯარიმო. სოლოვიოვმა ძლიერად დაარტყა კარის დაბალ, მარცხენა კუთხეში, მაგრამ მარლანიამ ბრწყინვალე ნახტომით გადაარჩინა გუნდი აშკარა გოლს. ამის შემდეგ დინამოელები მსაჯის საფინალო სასტვენამდე უტევდნენ მოწინააღმდეგეს, მაგრამ ანგარიში არ შეცვლილა.

მატჩი ლენინგრადში დამთავრდა თბილისელთა გამარჯვებით, ანგარიშით 2:1. ანთაძე, სპორტის დამსახურებული ოსტატი.

“ლელო”, 9 მაისი, 1954 წ.